



30 Jun 2014
30 June 2014
P.U. (A) 188

WARTA KERAJAAN PERSEKUTUAN

FEDERAL GOVERNMENT GAZETTE

PERATURAN-PERATURAN CUKAI BARANG DAN PERKHIDMATAN (KETETAPAN AWAL) 2014

GOODS AND SERVICES TAX (ADVANCE RULING) REGULATIONS 2014



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA CUKAI BARANG DAN PERKHIDMATAN 2014

PERATURAN-PERATURAN CUKAI BARANG DAN PERKHIDMATAN
(KETETAPAN AWAL) 2014

PADA menjalankan kuasa yang diberikan oleh seksyen 177 Akta Cukai Barang dan Perkhidmatan 2014 [*Akta 762*], Menteri membuat peraturan-peraturan yang berikut:

Nama dan permulaan kuat kuasa

1. (1) Peraturan-peraturan ini bolehlah dinamakan **Peraturan-Peraturan Cukai Barang dan Perkhidmatan (Ketetapan Awal) 2014**.

(2) Peraturan-Peraturan ini mula berkuat kuasa pada 1 April 2015.

Skop ketetapan awal

2. (1) Suatu ketetapan awal di bawah seksyen 77 Akta hendaklah dibuat bagi perkiraan yang secara serius akan dilaksanakan oleh orang yang memohon ketetapan awal.

(2) Ketua Pengarah boleh membuat suatu ketetapan awal tentang pemakaian mana-mana peruntukan Akta bagi perkiraan yang dinyatakan dalam suatu permohonan sama ada atau tidak sebutan telah dibuat kepada peruntukan itu dalam permohonan itu.

Orang yang boleh memohon ketetapan awal

3. (1) Seseorang, bagi pihak dirinya sendiri atau bagi pihak orang lain, boleh memohon kepada Ketua Pengarah bagi suatu ketetapan awal.

(2) Dua orang atau lebih boleh memohon secara bersesama, atau seseorang bagi pihak dua orang atau lebih boleh memohon, kepada Ketua Pengarah bagi suatu ketetapan awal.

Permohonan bagi ketetapan awal

4. (1) Seseorang yang memohon bagi suatu ketetapan awal di bawah subseksyen 77(2) Akta hendaklah mengemukakan kepada Ketua Pengarah butir-butir yang berikut:

- (a) maklumat mengenai identiti orang yang memohon ketetapan awal itu;
- (b) semua fakta yang relevan termasuk alasan untuk perkiraan itu dan dokumen yang berhubungan dengan perkiraan yang baginya ketetapan awal dipohon;
- (c) peruntukan Akta yang relevan berkenaan dengan ketetapan awal yang dipohon;
- (d) saranan undang-undang, jika ada, yang relevan kepada isu yang dibangkitkan dalam permohonan; dan
- (e) suatu pernyataan sama ada apa-apa permohonan yang terdahulu telah dibuat atas perkiraan yang sama atau yang serupa oleh orang yang memohon ketetapan awal itu dan keputusan permohonan yang sedemikian.

(2) Ketua Pengarah boleh mengetepikan kehendak untuk memberikan apa-apa maklumat yang dikehendaki di bawah subperaturan (1) jika Ketua Pengarah mendapati adalah tidak munasabah untuk menghendaki orang yang membuat permohonan itu untuk memberikan maklumat sedemikian.

(3) Ketua Pengarah boleh, pada bila-bila masa, menghendaki secara bertulis orang yang membuat permohonan itu untuk memberikan, dalam tempoh tiga puluh hari atau apa-apa tempoh lanjut yang diberikan oleh Ketua Pengarah, apa-apa dokumen atau maklumat tambahan sebagaimana yang difikirkan perlu oleh Ketua Pengarah.

(4) Jika apa-apa dokumen atau maklumat tambahan yang dikehendaki di bawah subperaturan (3) tidak diberikan oleh orang yang membuat permohonan, permohonan itu hendaklah disifatkan telah ditarik balik dan hendaklah tidak boleh diteruskan.

(5) Tanpa menjejaskan subperaturan (4), orang yang membuat permohonan boleh membuat permohonan baharu bagi suatu ketetapan awal kepada Ketua Pengarah.

(6) Mana-mana orang yang membuat suatu permohonan bagi suatu ketetapan awal boleh, pada bila-bila masa sebelum ketetapan awal itu dikeluarkan, menarik balik permohonannya melalui notis secara bertulis kepada Ketua Pengarah.

Hal keadaan yang ketetapan awal tidak boleh dikeluarkan

5. (1) Ketua Pengarah tidak boleh membuat ketetapan awal dalam hal keadaan yang berikut:

(a) jika ketetapan awal yang dipohon adalah berhubungan dengan mana-mana peruntukan Akta yang memberi kuasa atau menghendaki Menteri atau Ketua Pengarah—

(i) untuk mengenakan atau meremit suatu penalti, surcuj, fi atau wang lain;

(ii) untuk meremit apa-apa cukai yang genap masa dan kena dibayar;

(iii) untuk meluluskan mana-mana permohonan di bawah Akta;

(iv) untuk membuat pertanyaan mengenai betulnya mana-mana penyata, perisytiharan atau maklumat lain yang diberikan oleh mana-mana orang; atau

- (v) untuk mendapatkan sesuatu hutang yang masih belum dibayar oleh mana-mana orang.
- (b) jika pada masa permohonan bagi ketetapan awal dibuat atau pada bila-bila masa sebelum ketetapan awal dikeluarkan, orang yang memohon bagi ketetapan awal itu telah membuat atau melaksanakan perkiraan yang baginya ketetapan awal itu dipohon;
- (c) jika permohonan bagi ketetapan awal itu adalah remeh, menyusahkan atau berdasarkan keadaan andaian;
- (d) jika perkara yang baginya ketetapan awal itu dipohon melibatkan tafsiran mana-mana undang-undang asing;
- (e) jika suatu ketetapan awal telah dikeluarkan tentang pemakaian peruntukan Akta yang relevan bagi orang yang memohon ketetapan awal itu dan perkiraan yang berhubungan dengannya, dan ketetapan awal yang dipohon akan terpakai bagi tempoh yang sama dengan tempoh yang ketetapan awal yang dikeluarkan terdahulu itu terpakai;
- (f) jika suatu taksiran, tidak termasuk taksiran bagi sebarang cukai yang dianggarkan, yang berhubungan dengan orang yang memohon ketetapan awal dan perkiraan yang baginya ketetapan awal yang dipohon itu akan terpakai telah dibuat;
- (g) jika Ketua Pengarah sedang menjalankan audit atau penyiasatan tentang pemakaian mana-mana peruntukan Akta bagi orang yang memohon ketetapan awal itu atau tentang suatu perkiraan yang sama dengan perkiraan yang baginya ketetapan awal itu dipohon, dalam mana-mana tempoh yang ketetapan awal yang dipohon akan terpakai jika ketetapan awal itu dibuat;